

大佛頂首楞嚴經 卷三

① 二明六入性^{分二}

癸二六入

癸一總徵

復次，阿難！云何六入本如來藏妙真如性？

② 二別釋^{分六}

① 一明眼入即藏性

子一 眼入同是菩提

阿難！即彼目睛瞪發勞者，兼目與勞，同是菩提瞪發勞相。因於明暗二種妄塵，發見居中，吸此塵象，名為見性。此見離彼明暗二塵，畢竟無體。

如是，阿難！當知是見非明暗來，非於根出，不於空生。何以故？若從明來，暗即隨滅，應非見暗。若從暗來，明

即隨滅。應無見明。

若從根生，必無明暗。如是見精本無自性。

若於空出，前矚塵象。歸當見根。又空自觀，何關汝入？

是故當知眼入虛妄，本非因緣非自然性。

④二明耳入即藏性

子二 耳入同是菩提

阿難！譬如有人以兩手指急塞其耳，耳根勞故。頭中作聲，兼耳與勞。同是菩提瞪發勞相。

因於動靜二種妄塵，發聞居中。吸此塵象，名聽聞性。此聞離彼動靜二塵。畢竟無體。

如是，阿難！當知是聞非動靜來。非於根出。不於空生。

何以故？若從靜來，動即隨滅。應非聞動。若從動來，靜即隨滅。應無覺靜。

若從根生，必無動靜。如是聞體本無自性。

若於空出，有聞成性。即非虛空。又空自聞，何關汝入？

是故當知耳入虛妄，本非因緣非自然性。

⑤三明鼻入即藏性

子三 鼻入同是菩提

阿難！譬如有人急畜其鼻，畜久成勞。則於鼻中聞有冷觸，因觸分別通塞虛實。如是乃至諸香臭氣，兼鼻與勞。同是菩提瞪發勞相。

因於通塞二種妄塵，發聞居中。吸此塵象，名嗅聞性。

此聞離彼通塞二塵。畢竟無體。

當知是聞非通塞來。非於根出。不於空生。

何以故？若從通來，塞則聞滅。云何知塞？如因塞有，通則無聞。云何發明香臭等觸？

若從根生，必無通塞。如是聞機本無自性。
 若從空出，是聞自當迴嗅汝鼻。空自有聞，何關汝入？
 是故當知鼻入虛妄，本非因緣非自然性。

④四明舌入即藏性

子四 舌入同是菩提

阿難！譬如有人以舌舐吻，熟舐令勞，其人若病則有苦味，無病之人微有甜觸，由甜與苦，顯此舌根不動之時淡性常在。兼舌與勞，同是菩提瞪發勞相。
 因甜苦淡二種妄塵，發知居中吸此塵象，名知味性。
 此知味性離彼甜苦及淡二塵，畢竟無體。
 如是，阿難！當知如是嘗苦淡知非甜苦來，非因淡有，又非根出，不於空生。
 何以故？若甜苦來，淡則知滅，云何知淡？若從淡出，甜

即知亡，復云何知甜苦二相？

若從舌生，必無甜淡及與苦塵。斯知味根本無自性。
 若於空出，虛空自味，非汝口知。又空自知，何關汝入？
 是故當知舌入虛妄，本非因緣非自然性。

⑤五明身入即藏性

子五 身入同是菩提

阿難！譬如有人以一冷手觸於熱手，若冷勢多，熱者從冷，若熱功勝，冷者成熱。如是以此合覺之觸，顯於離知。
 涉勢若成，因於勞觸。兼身與勞同是菩提瞪發勞相。
 因於離合二種妄塵，發覺居中吸此塵象，名知覺性。
 此知覺體離彼離合違順二塵，畢竟無體。
 如是，阿難！當知是覺非離合來，非違順有，不於根出，又非空生。

何以故？若合時來，離當已滅。云何覺離？違順二相亦復如是。

若從根出，必無離合違順四相。則汝身知元無自性。

必於空出，空自知覺，何關汝入？

是故當知身入虛妄，本非因緣非自然性。

①六明意入即藏性

子六 意入同是菩提

阿難！譬如有人勞倦則眠，睡熟便寤，覽塵斯憶，失憶為忘，是其顛倒生住異滅，吸習中歸，不相踰越，稱意知根。兼意與勞同是菩提瞪發勞相。

因於生滅二種妄塵，集知居中吸撮內塵，見聞逆流，流不及地，名覺知性。

此覺知性離彼寤寐生滅二塵，畢竟無體。

如是，阿難！當知如是覺知之根非寤寐來，非生滅有，不於根出，亦非空生。

何以故？若從寤來，寐即隨滅，將何為寐？

必生時有，滅即同無，令誰受滅？若從滅有，生即滅無。

誰知生者？

若從根出，寤寐二相隨身開合，離斯二體，此覺知者同於空華，畢竟無性。

若從空生，自是空知，何關汝入？

是故當知意入虛妄，本非因緣非自然性。

②三明十二處性分二

癸三 十二處

③一總徵

復次，阿難！云何十二處本如來藏妙真如性？

⊗二別釋分六

①一明色與見即藏性

子一 見色俱無處所

阿難！汝且觀此祇陀樹林及諸泉池，於意云何？此等爲是色生眼見？眼生色相？

阿難！若復眼根生色相者，見空非色。色性應銷。銷則顯發一切都無，色相既無。誰明空質？

空亦如是。

若復色塵生眼見者，觀空非色。見即銷亡，亡則都無。誰明空色？

是故當知見與色空俱無處所，即色與見二處處虛妄，本非因緣非自然性。

②一明聽與聲即藏性

子一 聽聲俱無處所

阿難！汝更聽此祇陀園中，食辦擊鼓。衆集撞鐘，鐘鼓音聲前後相續。

於意云何？此等爲是聲來耳邊？耳往聲處？

阿難！若復此聲來於耳邊，如我乞食室羅筏城，在祇陀林則無有我。此聲必來阿難耳處，目連迦葉應不俱聞。何況其中一千二百五十沙門。一聞鐘聲同來食處？

若復汝耳往彼聲邊，如我歸住祇陀林中，在室羅筏城則無有我。汝聞鼓聲，其耳已往擊鼓之處，鐘聲齊出應不俱聞。何況其中象馬牛羊種種音響？

若無來往，亦復無聞。

是故當知聽與音聲俱無處所，即聽與聲二處處虛妄，本非因緣非自然性。

④三 明 鼻 與 香 即 藏 性

子三 鼻 香 俱 無 處 所

阿難！汝又鼻此鑪中栴檀，此香若復然於一鉢，室羅筏城四十里內同時聞氣。

於意云何？此香爲復生旃檀木？生於汝鼻？爲生於空？

阿難！若復此香生於汝鼻？稱鼻所生。當從鼻出。鼻非旃檀，云何鼻中有栴檀氣？稱汝聞香。當於鼻入。鼻中出香。說聞非義。

若生於空，空性常恒。香應常在，何藉鑪中熱此枯木？

若生於木，則此香質因熱成煙，若鼻得聞。合蒙煙氣。其煙騰空未及遙遠，四十里內云何已聞？

是故當知香鼻與聞俱無處所，即鼻與香二處虛妄，本非因緣非自然性。

④四 明 嘗 與 味 即 藏 性

子四 嘗 味 俱 無 處 所

阿難！汝常二時衆中持鉢，其間或遇酥酪醍醐。名爲上味。於意云何？此味爲復生於空中？生於舌中？生於食中？

阿難！若復此味生於汝舌，在汝口中祇有一舌，其舌爾時已成酥味，遇黑石蜜應不推移。若不變移，不名知味。若變移者，舌非多體。云何多味一舌之知？

若生於食，食非有識。云何自知？又食自知，即同他食，何預於汝。名味之知？

若生於空，汝噉虛空。當作何味？必其虛空，若作鹹味，既鹹汝舌。亦鹹汝面，則此界人同於海魚。既常受鹹。了不知淡。若不識淡。亦不覺鹹。必無所知。云何名味？

是故當知味舌與嘗俱無處所，即嘗與味二俱虛妄，本非因

緣非自然性。

⑤五明身與觸即藏性

子五 身觸俱無處所

阿難！汝常晨朝以手摩頭。於意云何？此摩所知，誰為能觸？能為在手？為復在頭？若在於手，頭則無知，云何成觸？若在於頭，手則無用，云何名觸？若各各有，則汝阿難應有二身。若頭與手一觸所生，則手與頭當為一體。若一體者，觸則無成。若二體者，觸誰為在？在能非所，在所非能。不應虛空與汝成觸。

是故當知覺觸與身俱無處所，即身與觸二俱虛妄，本非因緣非自然性。

⑥六明意與法即藏性

子六 意法俱無處所

阿難！汝常意中所緣善惡無記三性，生成法則。此法為復

即心所生？為當離心別有方所？阿難！若即心者，法則非塵，非心所緣，云何成處？若離於心別有方所，則法自性為知非知？知則名心，異汝非塵，同他心量。即汝即心，云何汝心更二於汝？若非知者，此塵既非色聲香味離合冷暖及虛空相，當於何在？今於色空都無表示，不應人間更有空外。心非所緣，處從誰立？

是故當知法則與心俱無處所，則意與法二俱虛妄，本非因緣非自然性。

⑦四明十八界性分三

癸四 十八界

⑧一總徵

復次，阿難！云何十八界本如來藏妙真如性？

⑨一別釋分六

① 一明眼識界即藏性

子一 眼色識界不可得

阿難！如汝所明眼色為緣生於眼識，此識為復因眼所生。以眼為界？因色所生。以色為界？

阿難！若因眼生，既無色空。無可分別，縱有汝識。欲將何用？汝見又非青黃赤白，無所表示。從何立界？

若因色生，空無色時。汝識應滅，云何識知是虛空性？

若色變時，汝亦識其色相遷變，汝識不遷。界從何立？

從變則變，界相自無，不變則恒。

既從色生，應不識知虛空所在。

若兼二種。眼色共生，合則中離。離則兩合，體性雜亂。云何成界？

是故當知眼色為緣生眼識界。三處都無，則眼與色及色界

三．本非因緣非自然性。

① 二明耳識界即藏性

子一 耳聲識界不可得

阿難！又汝所明耳聲為緣生於耳識，此識為復因耳所生以耳為界？因聲所生以聲為界？

阿難！若因耳生，動靜二相既不現前，根不成知。必無所知，知尚無成，識何形貌？

若取耳聞，無動靜故。聞無所成。云何耳形雜色觸塵。名為識界？則耳識界復從誰立？

若生於聲，識因聲有則不關聞，無聞則亡聲相所在。識從聲生，許聲因聞而有聲相；聞應聞識，不聞非界，聞則同聲。識已被聞，誰知聞識？若無知者，終如草木，不應聲聞雜成中界。界無中位，則內外相復從何成？

是故當知耳聲爲緣生耳識界。三處都無，則耳與聲及聲界三。本非因緣非自然性。

⊕二明鼻識界即藏性

子三 鼻香識界不可得

阿難！又汝所明鼻香爲緣生於鼻識，此識爲復因鼻所生以鼻爲界？因香所生以香爲界？

阿難！若因鼻生，則汝心中以何爲鼻？爲取肉形雙爪之相？爲取嗅知動搖之性？

若取肉形，肉質乃身。身知即觸，名身非鼻。名觸即塵。鼻尚無名，云何立界？

若取嗅知，又汝心中以何爲知？以肉爲知，則肉之知。元觸非鼻。以空爲知，空則自知。肉應非覺。如是則應虛空是汝。汝身非知。今日阿難應無所在。

以香爲知，知自屬香。何預於汝？

若香臭氣必生汝鼻，則彼香臭二種流氣。不生伊蘭及栴檀木。二物不來。汝自嗅鼻，爲香爲臭？臭則非香。香應非臭，

若香臭二俱能聞者，則汝一人應有兩鼻。對我問道有二阿難，誰爲汝體？

若鼻是一。香臭無二，臭既爲香。香復成臭，二性不有，界從誰立？

若因香生，識因香有，如眼有見。不能觀眼，因香有故。應不知香。知即非生，不知非識。香非知有。香界不成。識不知香，因界則非從香建立。既無中間，不成內外，彼諸聞性畢竟虛妄。

是故當知鼻香爲緣生鼻識界三處都無，則鼻與香及香界三
• 本非因緣非自然性。

④四明舌識界即藏性

子四 舌味識界不可得

阿難！又汝所明舌味爲緣生於舌識，此識爲復因舌所生以
舌爲界？因味所生以味爲界？

阿難！若因舌生，則諸世間甘蔗烏梅黃連石鹽細辛薑桂都
無有味。汝自嘗舌，爲甜爲苦？若舌性苦，誰來嘗舌？舌
不自嘗，孰爲知覺？舌性非苦，味自不生，云何立界？

若因味生，識自爲味。同於舌根，應不自嘗，云何識知是
味非味？又一切味非一物生，味既多生。識應多體。識體
若一。體必味生，鹹淡甘辛和合俱生，諸變異相同爲一味
，應無分別。分別既無則不名識，云何復名舌味識界？

不應虛空生汝心識。

舌味和合，即於是中元無自性，云何界生？

是故當知舌味爲緣生舌識界三處都無，則舌與味及舌界三
• 本非因緣非自然性。

⑤五明身識界即藏性

子五 身觸識界不可得

阿難！又汝所明身觸爲緣生於身識，此識爲復因身所生以
身爲界？因觸所生以觸爲界？

阿難！若因身生，必無合離二覺觀緣，身何所識？

若因觸生，必無汝身，誰有非身知合離者？

阿難！物不觸知，身知有觸；知身即觸，知觸即身；即觸
非身，即身非觸。身觸二相。元無處所。合身即爲身自體
性，離身即是虛空等相。內外不成，中云何立？中不復立

• 內外性空，則汝識生。從誰立界？
 是故當知身觸為緣生身識界三處都無，則身與觸與身界三
 • 本非因緣非自然性。

④六明意識界即藏性

子六 意法識界不可得

阿難！又汝所明意法為緣生於意識，此識為復因意所生以意為界？因法所生以法為界？

阿難！若因意生，於汝意中必有所思。發明汝意。若無前法，意無所生。離緣無形，識將何用？又汝識心與諸思量兼了別性，為同為異？同意即意，云何所生？異意不同，應無所識。若無所識，云何意生？若有所識，云何識意？唯同與異。二性無成，界云何立？

若因法生，世間諸法。不離五塵，汝觀色法及諸聲法香法

味法及與觸法，相狀分明。以對五根，非意所攝。汝識決定依於法生，汝今諦觀。法法何狀？若離色空動靜通塞合離生滅，越此諸相。終無所得。生則色空諸法等生，滅則色空諸法等滅。所因既無，因生有識。作何形相？相狀不有，界云何生？

是故當知意法為緣生意識界三處都無，則意與法及意界三
 • 本非因緣非自然性。』

⑤二明性本具相分三

辛四 出法體融顯如來藏分一

①一當機疑問

壬一 總疑總遣

阿難白佛言：『世尊！如來常說和合因緣，一切世間種種變化。皆因四大和合發明。云何如來「因緣自然」二俱排

擯？我今不知斯義所屬，惟垂哀愍開示衆生中道了義無戲論法！』

己二訶誠許宣

爾時，世尊告阿難言：『汝先厭離聲聞緣覺諸小乘法，發心勤求無上菩提，故我今時爲汝開示第一義諦。如何復將世間戲論妄想因緣而自纏繞？汝雖多聞，如說藥人，真藥現前，不能分別。如來說爲真可憐愍。汝今諦聽！吾當爲汝分別開示，亦令當來修大乘者通達實相。』

阿難默然承佛聖旨。

己三正爲開示分二

庚一牒疑總示分二

辛一就法破妄

『阿難！如汝所言四大和合發明世間種種變化，阿難！若彼大性體非和合，則不能與諸大雜和，猶如虛空不和諸色。若和合者，同於變化，始終相成，生滅相續，生死死生，生生死死，如旋火輪，未有休息。

辛二借喻顯理

阿難！如水成冰，冰還成水。

庚二歷大別顯分七

壬一別融別顯分七

辛一明藏性即地大性分三

癸一 地大

壬一破妄執

汝觀地性，麤爲大地，細爲微塵，至鄰虛塵，析彼極微色邊際相七分所成；更析鄰虛，即實空性。

阿難！若此鄰虛，析成虛空，當知虛空出生色相。

汝今問言「由和合故出生世間諸變化相」，汝且觀此一鄰虛塵，用幾虛空和合而有？不應鄰虛合成鄰虛。

又鄰虛塵析入空者，用幾色相合成虛空？

若色合時，合色非空，若空合時，合空非色。

色猶可析，空云何合？

⊕二顯理性

汝元不知如來藏中「性色真空，性空真色」，清淨本然，周徧法界，隨衆生心，應所知量，循業發現。

⊕三斥迷惑

世間無知，惑爲因緣及自然性，皆是識心分別計度。但有言說，都無實義。

⊕二明藏性即火大性^{分三}

癸一 火大

⊕一破妄執

阿難！火性無我，寄於諸緣。汝觀城中未食之家欲炊爨時，手執陽燧，日前求火。

阿難！名和合者，如我與汝一千二百五十比丘今爲一衆，衆雖爲一，詰其根本，各各有身，皆有所生氏族名字。

——如舍利弗，婆羅門種；優樓頻螺，迦葉波種；乃至阿難，瞿曇種姓。

阿難！若此火性因和合有，彼手執鏡於日求火，此火爲從鏡中而出？爲從艾出？爲於日來？

阿難！若日來者，自能燒汝手中之艾，來處林木皆應受焚。若鏡中出，自能於鏡出然於艾，鏡何不鎔？紆汝手執，尙無熱相，云何融泮？

若生於艾，何藉日鏡光明相接然後火生？

汝又諦觀，鏡因手執。日從天來。艾本地生，火從何方遊歷於此？

日鏡相遠。非和非合，不應火光無從自有。

①二顯理性

汝猶不知如來藏中「性火真空。性空真火」，清淨本然。周徧法界，隨衆生心。應所知量。

阿難！當知世人一處執鏡。一處火生，徧法界執。滿世間起。起徧世間。寧有方所？循業發現。

①三斥迷惑

世間無知，惑爲因緣及自然性，皆是識心分別計度。但有言說，都無實義。

②三明藏性即水大性分三

癸三 水大

①一破妄執

阿難！水性不定，流息無恒。如室羅城迦毘羅仙、斫迦羅仙、及鉢頭摩、訶薩多等諸大幻師，求太陰精用和幻藥。是諸師等於白月晝手執方諸承月中水，此水爲復從珠中出？空中自有？爲從月來？

阿難！若從月來，尙能遠方令珠出水，所經林木皆應吐流。流則何待方諸所出？不流。明水非從月降。

若從珠出，則此珠中常應流水，何待中霄承白月晝？

若從空生，空性無邊。水當無際，從人洎天。皆同滔溺。

云何復有水陸空行？

汝更諦觀，月從天陟。珠因手持。承珠水盤本人敷設，水

從何方流注於此？月珠相遠，非和非合，不應水精無從自有。

①二顯理性

汝尚不知如來藏中「性水真空，性空真水」，清淨本然，周徧法界，隨衆生心，應所知量。一處執珠，一處水出，徧法界執，滿法界生。生滿世間，寧有方所？循業發現。

①三斥迷惑

世間無知，惑爲因緣及自然性，皆是識心分別計度。但有言說，都無實義。

①四明藏性即風大性分三

癸四 風大

①一破妄執

阿難！風性無體，動靜不常。汝常整衣入於大衆，僧伽梨

角動及傍人，則有微風拂彼人面。此風爲復出袈裟角？發於虛空？生彼人面？

阿難！此風若復出袈裟角，汝乃披風，其衣飛搖，應離汝體。我今說法會中垂衣，汝看我衣，風何所在？不應衣中有藏風地。

若生虛空，汝衣不動，何因無拂？空性常住，風應常生，若無風時，虛空當滅，滅風可見，滅空何狀？若有生滅，不名虛空，名爲虛空，云何風出？

若風自生被拂之面，從彼面生，當應拂汝。自汝整衣，云何倒拂？

汝審諦觀，整衣在汝，面屬彼人，虛空寂然不參流動，風自誰方鼓動來此？風空性隔，非和非合，不應風性無從自

有。

⊕二顯理性

汝宛不知如來藏中「性風真空・性空真風」，清淨本然・周徧法界，隨衆生心・應所知量。阿難！如汝一人微動服衣・有微風出，徧法界拂・滿國土生，周徧世間・寧有方所？循業發現。

⊕三斥迷惑

世間無知，惑爲因緣及自然性，皆是識心分別計度。但有言說，都無實義。

⊕五明藏性即空大性分四

癸五 空大

⊕一破妄執

阿難！空性無形，因色顯發。如室羅城去河遙處，諸刹利

種及婆羅門、毘舍、首陀、兼頗羅墮、旃陀羅等，新立安居，鑿井求水，出土一尺・於中則有一尺虛空，如是乃至出土一丈・中間還得一丈虛空；虛空淺深，隨出多少。

此空爲當因土所出？因鑿所有？無因自生？

阿難！若復此空無因自生，未鑿土前何不無礙？唯見大地迴無通達。

若因土出，則土出時應見空入。若土先出無空入者，云何虛空因土而出？

若無出入，則應空土元無異因。無異則同，則土出時・空何不出？

若因鑿出，則鑿出空・應非出土。不因鑿出，鑿自出土・云何見空？

汝更審諦，諦審諦觀，鑿從人手，隨方運轉，土因地移，如是虛空，因何所出？鑿空虛實，不相爲用，非和非合，不應虛空無從自出。

⑤二明大均

若此虛空，性圓周徧，本不動搖，當知現前地水火風均名五大，性真圓融，皆如來藏，本無生滅。

阿難！汝心昏迷，不悟四大元如來藏，當觀虛空爲出爲入爲非出入？

⑥三顯理性

汝全不知如來藏中「性覺真空，性空真覺」，清淨本然，周徧法界，隨衆生心，應所知量。

阿難！如一井空，空生一井。十方虛空亦復如是。圓滿十

方，寧有方所？循業發現。

⑦四斥迷惑

世間無知，惑爲因緣及自然性，皆是識心分別計度。但有言說，都無實義。

⑧六明藏性即根大性^{分四}

癸六 見大

①一破妄執

阿難！見覺無知，因色空有。如汝今者在祇陀林，朝明夕昏。設居中宵，白月則光，黑月便暗，則明暗等因見分析。此見爲復與明暗相并太虛空，爲同一體？爲非一體？或同非同？或異非異？

阿難！此見若復與明與暗及與虛空，元一體者，則明與暗二體相亡，暗時無明，明時無暗。若與暗一，明則見亡，

必一於明・暗時當滅。滅則云何見明見暗？若明暗殊・見無生滅，一云何成？

若此見精與暗與明非一體者，汝離明暗及與虛空，分析見元作何形相？離明離暗及離虛空，是見元同龜毛兔角。

明暗虛空三事俱異，從何立見？明暗相背，云何或同？離三元無，云何或異？分空分見，本無邊畔，云何非同？見暗見明，性非遷改，云何非異？

汝更細審・微細審詳，審諦審觀，明從太陽・暗隨黑月，通屬虛空・壅歸大地，如是見精・因何所出？

見覺空頑・非和非合，不應見精無從自出？

⊕二明大均

若見聞知性圓周徧本不動搖，當知無邊不動虛空并其動搖

地水火風均名六大，性真圓融・皆如來藏・本無生滅。

阿難！汝性沈淪，不悟汝之見聞覺知本如來藏。汝當觀此見聞覺知，爲生爲滅？爲同爲異？爲非生滅？爲非同異？

⊕三顯理性

汝會不知如來藏中「性見覺明・覺精明見」，清淨本然，周徧法界，隨衆生心・應所知量。如一見根見周法界，聽嗅嘗觸覺觸覺知，妙德瑩然，徧周法界，圓滿十虛，寧有方所？循業發現。

⊕四斥迷惑

世間無知，惑爲因緣及自然性，皆是識心分別計度。但有言說，都無實義。

⊕七明藏性即識大性^{分四}

癸七 識大

⑩ 一破妄執

阿難！識性無源，因於六種根塵妄出。汝今徧觀此會聖衆，用目循歷，其目周視但如鏡中無別分析，汝識於中次第標指——此是文殊、此富樓那、此目犍連、此須菩提、此舍利弗。

此識了知爲生於見？爲生於相？爲生虛空？爲無所因突然而出？

阿難！若汝識性生於見中，如無明暗及與色空——四種必無，元無汝見。見性尚無，從何發識？

若汝識性生於相中，不從見生，既不見明，亦不見暗，明暗不屬，即無色空；彼相尚無，識從何發？

若生於空，非相非見，非見無辨，自不能知明暗色空，非

相滅緣。見聞覺知無處安立。處此二非，空則同無，有非同物；縱發汝識，欲何分別？

若無所因突然而出，何不日中別識明月？

汝更細詳，微細詳審，見託汝睛，相推前境，可狀成有，不相成無。如是識緣，因何所出？識動見澄，非和非合，聞聽覺知亦復如是，不應識緣無從自出。

⑪ 二明大均

若此識心本無所從，當知了別見聞覺知圓滿湛然性非從所。兼彼虛空地水火風，均名七大。性真圓融皆如來藏本無生滅。

阿難！汝心麤浮，不悟見聞發明了知本如來藏。汝應觀此六處識心，爲同爲異？爲空爲有？爲非同異？爲非空有？

⑩三顯理性

汝元不知如來藏中「性識明知・覺明真識」，妙覺湛然徧周法界，含吐十虛・寧有方所？循業發現。

⑪四斥迷惑

世間無知，惑為因緣及自然性，皆是識心分別計度。但有言說，都無實義。』

①四大衆圓悟分二

庚一 獲本妙心

②一經家敍益分二

③一敍益分一

④一略敍

爾時，阿難及諸大衆蒙佛如來微妙開示，身心蕩然，得無罣礙。

⑤二廣敍分二

⑥一圓悟三大分三

⑦一悟性量即是相大

是諸大衆各各自知心徧十方，見十方空如觀手中所持葉物

，

⑧二悟性體即是體大

一切世間諸所有物皆即菩提妙明元心，心精徧圓・含裹十方。

⑨三悟性具即是用大

反觀父母所生之身，猶彼十方虛空之中吹一微塵，若存若亡，如湛巨海流一浮漚，起滅無從。

⑩二結屬真因

了然自知獲本妙心常住不滅。

㊟二敘儀

禮佛合掌，得未曾有。於如來前說偈讚佛．．

㊟二當機偈讚分二

㊟一讚歎述益分二

㊟一讚圓常人法

『妙湛總持不動尊 首楞嚴王世希有

㊟二述所證淺深

銷我億劫顛倒想 不歷僧祇獲法身

㊟二誓願請加分三

㊟一發大願

願今得果成寶王 還度如是恒沙衆

將此深心奉塵刹 是則名為報佛恩

伏請世尊為證明 五濁惡世誓先入

如一衆生未成佛 終不於此取泥洹

㊟二請佛加

大雄大力大慈悲 希更審除微細惑

令我早登無上覺 於十方界坐道場

㊟三喻不退

舜若多性可銷亡 爍迦羅心無動轉』

大佛頂首楞嚴經 卷三